

Azaroaren 24an

JESU KRISTO GURE JAUNA, DIREN GUZTIEN ERREGEA

Agurra

Kristo, diren guztien Erregea, gerta dakizuela bake eta salbamen eta Haren maitasuna izan bedi zuekin.

Sarrerako oharpena

Liturgi-urteari amaiera emanaz Kristo Erregearen jaia ospatzen dugu gaur. Bera da gure historiaren erdi-muina; Berarengana goaz, Bera dugu helmuga.

Gaur Bere mahaian biltzen gaitu, Bere artzain-jarrera, Bere zerbitzu gogoa, Bere maitasun gozoa geure egin ditzagun. Eta egun batean, Berari leial jarraitzen saiatzen diren guztiak amaigabeko mahaian bilduko ditu zeruko erreinuan. Berari aintza eta gorespen!

Damu-otoitza

Gurutzea du Kristok Bere errege-aulkia. Berari begiratzuz, eska diezaiozun gure bekatuen barkamena.

—Jesus Jauna, gizaki guztien Salbatzaile zarena. Erruki, Jauna.

—Jesus Jauna, gu guztiontzat gizatasun eredu zarena. Kristo, erruki.

—Jesus Jauna, guztion bihotzak Zuregana erakartzen dituzuna. Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara.

Otoitza

**Jainko ahalguztidun betierekoa,
zure Seme maitea, diren guztien Erregea,
gauza guztien oinarri eta buru ezarri zenuen;
egizu, izaki guztiek,
bekaturen uztarritik askatuta,
beti eta beti Zu zerbitza zaitzatela eta goretsi.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.**

Hitzaren liturgiari oharpena

Samuelen liburuan Daviden gantzutzea kontatuko zaigu eta Ebanjelioan, Jesus ikusiko dugu errege, baina gurutzean iltzatua eta heriotzaren atarian. Gurutzean estuasun bera pasatzen ari den gaizkile batek bakarrik aitortzen du Jaun eta Jainko. Kolosarren gutuneko gorazarreak lagunduko digu guri Jesus bihotzez goratzen.

Lehenengo irakurgaia (2 Sm 5, 1-3)

Daniel profetaren liburutik

Egun haietan, Israelgo leinu guztiak etorri ziren Davidengana Hebrona, eta esan zioten: «Zure hezur eta zure mami gaituzu. Lehendik ere, Saul errege zela, zu zintuen gidari Israelek bere joan-etorrietan. Gainera zuri esana dizu Jaunak: "Zu izango zaitu nire herri Israelek bere artzain, zu izango zaitu buru Israelek"».

Etorri ziren, beraz, Israelgo zahar guztiak erregearengana Hebrona. David erregek elkargo egin zuen haiekin Hebronon Jaunaren aurrean, eta David Israelgo errege gantzutu zuten.

Erantzun-salmoa (*Sal* 121, 1-2. 4-5)

Zu - re e - txe - ra go - az, Jau - na, hau - xe da
 po - za dau - ka - gu - na.

Hura poza nirea, esan zidatenean:

«Bagoaz Jaunaren etxera!»

Oraintxe gure oinak iritsi dira,

Jerusalem, zure atarira. R/.

Leinuak, Jaunaren leinuak, hara igotzen dira,

Israelen lege denez Jaunaren izena ospatzera.

Han dago jarririk auzi-mahaia,

Davideneko mahaia. R/.

Bigarren irakurgaia (*Kol* 1, 12-20)

San Paulo Apostoluak Kolosarrei

Senideok: Pozez eskerrak ematen dizkiogu Aita Jainkoari, argian santuen oinordelagun egin gaituenari. Ilunbearen menpetik atera baikaitu, eta bere Seme maitearen erreinura aldatu. Honengan dugu erospena, Honengan bekaturen barkamena. Hau, Jainko ikustezinaren irudi da, sorkari guztietan lehen semea. Beronen bidez baitira eginak gauza guztiak, zeru-lurretakoak, ageri direnak eta ez direnak: Aulki, Jaun, Nagusi eta Agintedunak; gauza guztiak Beraren bidez eta Berarentzat dira eginak.

Diren guztiak baino lehenago da Bera, eta guztiak Berarengan diraute. Gorputzaren buru ere Bera da, Elizaren buru, alegia. Bera da hasiera, hilen arteko lehen semea, diren guztietan Bera izan dadin lehenengoa. Jainkoaren gogoko izan baita betearen betea Harengan egotea, eta Haren bidez, gauza guztiak Berekin adiskidetzea; Haren gurutzeko odolaz bakeak eginik, zeru-lurretan diren guztiakin.

Aleluia (Mk 11, 10)

A - le-lu - ia, a - le-lu - ia, a - le-lu - ia.

Bedeinkatua, Jaunaren izenean datorrena!
 Bedeinkatua, gure aita Davidengandik
 datorren erreinua! R/.

Ebanjelioa (Lk 23, 35b-43)

Homiliarako argibideak

Juduen erregea

Zoritxarrez, bere zigorrekin mehatxatutako moralitate publikoaren zaindari gisa agertu da Eliza askoren begietara mende askotan. Jainkoa kondenatzaile eta zigortzaile izatera mugatzen zen batzuetan. Jainkoari esker, Jainkoaren aurpegi maitagarria ikusten ari gara pixkanaka, eta gure Eliza ere gero eta abegikorragoa eta hurbilagoa izan dadin espero dugu.

“Nazareteko Jesus, Juduen Errege” dioen gurutzeko “goiburuak” Pilatok gurutzean hiltzera zigortzeko egindako salaketa adierazten zuen (*Lk 23, 35-43*). Jesusek, gurutziltzatuta dagoenak, isekak jasoko ditu agintari juduen, soldaduen eta berarekin batera gurutziltzatutako lapur baten aldetik. Barre egingo diote denek, **ustezko errege** izateagatik. Agintariak Jainkoaren Mesia titulua aldarrikatuko dute, itxaron duten eta Daviden ondorengo den Erregearen izen hebrearra (*2 Sam 5, 1-3*). Jesusek eginak zituen mirari batzuk, bere mesias boterea, salbazio-boterea, erakuts zezaketenak, baina une horretan ez da bere burua salbatzeko gai. Soldaduek juduen erregea aldarrikatzen dute ironiaz, eta agintari juduei jarraituz, bere burua gurutzeko supliziotik salbatzeko esaten diote. Hori bera egiten du lapurrak ere; gurutzeko bere adiskideak salbatzeko eskatuko dio ironiaz. Nolabaiteko fartsa baten aurrean gaude, horren bidez, baina egia argituko da.

Jesusen mesianismoaren egia bizi duen unea eta Jesusen errealitatea serio hartzen dituen beste lapurrak argituko du. Heriotzaren unea ez da Jainkoaren Mesiaen nahiaz eta salbazioaz burla egiteko unea. Errespetuz Jainkoaren beldur izateko unea da. Lapur onak Jesusen eta euren suplizioaren arteko desberdintasuna aitortzen du. Eurek merezia dute, euren ekintzengatik; Jesusek, ordea, ez du zigor hori merezi duen ezer egin. Lapur onak **Jesus Erreinuan sartuko dela** onartzen du, eta berarekin oroitzeko eskatzen dio. Jesusen mesianismoaren sinesmenaren aitortza da, zirkunstantzia guztiek gezurtatzen dutela diruditenean, hain zuzen ere.

Berehalako salbamena agintzen dio Jesusek, egun hartan bertan. Harekin egotean datza salbamena. Elkarrekin gurutziltzatu izanak salbamena aurreratzen du, nolabait, batek gurutzean dagoen horretan Mesia, munduaren salbatzailea, ikusten duenean. Hala, une latz horretan agertzen da Jainkoaren salbazioa, ez da etorkizun

urrunera atzeratzen. Gurutziltatzearen unea **Jesus Erregea tronuratzan** deneko unea da, bere dohain bikainak banatzen hasten denekoa. Harengan sinesten duenak salbazioa lortzen du. Gurutzean hilda, gizon egin zen unetik bertatik dena Aitarengandik jasotzen duen bere Seme-izaeraren misterioa betetzen du Jesusek. Obedientziatzko misterio horretan, erabat fidatzen da Aitarekin, betiko eta orain denboran ere sortzen duenarekin. Heriotzarekin, loriatze-unea ere badenarekin, izaki orotan Lehena bihurtzen da, zinez, eta Jainkoaren seme-alaba izatera iristen gara gu ere (*Kol* 1,12-20).

Kristo Erregearen jaiarekin amaitzen dugu kristauok urte liturgikoa. Haren erregetzak ez du zerikusi handirik mundu honetako sistema politikoekin. Gurutzean hiltzea da giza triunfalismo huts ororen porrotaren froga. Era berean, baina, Jainkoaren Erregetzaren etorrera adierazten du gurutzeak, gurutziltzatuarena, hain zuzen ere. Gurutzean, bere erregetza hasiko du Jainkoak, justizia ezartzen hasiko da. Haren epaiketa bekatuaren zigorra da, baina baita **salbazio eskaintza** ere, bihurtzen den bekatariarentzat. Gurutzean, Jainkoak bakeak egin ditu gizakiekin eta gizakien artean. Horixe da Jainkoaren Erreinua. Aita maitagarri gisa agertzen den Jainkoarekiko eta anaia-arrebekiko harremana beste modu batera bizitzeko aukera zabaltzen du. Eukaristiak Kristoren Erreinua, egiaren, justiziaren, maitasunaren eta bakearen Erreinua, eraikitzen lagun diezagula.

Jainkoaren herriaren otoitza

Zuzen diezazkiogun gure otoitzak Kristori, Bera baita gauza guztien Jauna eta Erregea:

—Elizako artzain eta kide guztiak saia daitezela beti gizadi osoa Jainkoarengana gerturatzen eta Kristoren gurutzeaz denei bake-bidea eskaintzen. Eska diezaigun Jaunari.

- Erljio eta kultura guztietan ezkutuan dagoen Ebanjelioaren haziak frutu eman eta ager dadin, guztiek ezagutu dezaten Kristo dela Jauna Jainko Aitaren aintzarako. Eska diezaiogun Jaunari.
- Bekatuak, atsekabeak edo ezinak harrapatuta dauden guztiek Kristoren erreinuko askatasuna ezagutu dezaten. Eska diezaiogun Jaunari.
- Gaur Kristo Erregearen festaburua ospatzen dugun guztiok izan dezagula egun batean zeruko oinordekotza, argiaren erreinuan. Eska diezaiogun Jaunari.

Jauna, Aita guztiz santua, Jaungoiko ahalguztidun betierekoa, justizian eta maitasunean Zurekin errege izatera dei egiten diguzu; entzun Zure herriaren otoitzak, atera gaitzazu ilunaldi guztietatik eta sendotu gure gogoak, Zure Semearen urratsak jarrai ditzagun, gure bizitza besteentzat eman ez, Kristoren paradisuko erregetza ere partekatu dezagun. Errege bizi baita gizaldi eta gizaldietan.

Jaunartze-ondorengo otoitza

**Betiereko biziaren ogia harturik, Jauna,
Zuri deiez gaude:
Kristo zeru-lurren Erregearen aginduak betetzea
aintzagarri daukagunok
iritsi dezagula
Berarekin zeruetako erreinuan beti bizitzea.
Jesu Kristo gure Jaunaren bitartez.**